

Kolosi

Kolosi niŋ Yesuyen alya bereya hitte Pol belen asan kayyin

1 ¹⁻²Ne Polbe kadniniŋ Timotiya dufay unŋkuren po kerdeb den Kolosi taunde niŋ Yesu Kristuyen alya bereya sios niŋ asan gago kan hime. Nebe Al Kurunyen dufayde Yesu Kristuyen mere basan al aposel himirin. Denbe Yesu Kristuya hen Al Kurun diliŋde wukken hitin, irde bitinde mat fudinde wor po meremin gama irde hanŋyen.

Ningeb Adoniniŋ Al Kurun belen buniŋen dirde igin igin dirde bitin yisikamke igin po hiwon yen nurde hime.

³⁻⁴Be, deyyabe den belen Yesu Kristu niŋ dufaytin sanin irde Al Kurunyen alya bereya goke amanen nurde yunen hanŋyen gote mere momotin goyen nurde haryen. Ningeb den ge ten Doyan Al Kurunniŋ Yesu Kristu Naniŋ Al Kurun mere irde henyabe huginen igin nurde unen haryen. ⁵Den belen Yesu niŋ dufaytin taren irde kadtin ge amanen nurde yunen hanŋyen mata gobe Al Kurun belen kame igin igin diryen go yen dufay henbe gogo gwaha ten hanŋyen. Dufay gobe hanŋkapy Yesu niŋ yitin mere igin fudinde goyen nuraminde mat forok yirin. Dufay gokeb den goyen Al Kurun belen kame igin igin yiren yen nurde ga hi. ⁶Mere igin goyen hanŋkapy wor po den hitte kukeb Al Kurun belen buniŋen dirde igin igin dird dird mere goyen nurdeb fudinde yamin. Irdeb dufaytinya matatinyabe hoyan wor po hamin. Gwahade goyen po, megen kurun gayen mere igin gore iginen hen kurun hen kun hi. ⁷Denbe mere igin goyen meten kadniniŋ wor po Epafras belen kun momon dirke nuramin. Yenbe binde mat fudinde wor po Yesu Kristu niŋ meten ten hiyen. Ningeb nen belen kun saba dirtinenbe yen belen nen faran dure yen gogo kun saba diryin. ⁸Irdeb mulgan hen wanbe den belen Holi Spirityen tarende kadtin ge amanen nurde yunen hanŋyen goyen momon diryin.

Kolosi niŋ mar niŋ Al Kurun gusunan irde hinhin

⁹Ningeb mere momotin nuraruŋ goyenter mat den ge ten Al Kurun gusunan ird ird niŋ bada ma hen haryen. Gusunan irde henyabe Holi

Spirit beleŋ yende dufay wukken kurun goya meremiŋ bebak ten ten saŋiŋya goyen dunwoŋ, irkeb Al Kurunyen dufay keneŋ kenkela wor po bebak tiwoŋ yeŋ gusuŋaŋ irde haryen. ¹⁰Gogab matatiŋ gobe Doyaŋ Al Kurunyen alya bereya beleŋ mata ten hanŋyen gwahade po ten hinayiŋ, irde yeŋ beleŋ amaŋeŋ nurde hitek mat po mata ten hinayiŋ, irdeb meten igiŋ po ten gote igineŋ kurun forok yirde hinayiŋ. Irde Al Kurunbe al gwahade yeŋ kenkela nurde yeŋya kadom nurd gunen ten ten gobe kurun heŋ tareŋ heŋ hiyeŋ.

¹¹Irdeb kanduk kurayen kurayen kurun yeneŋ hinayiŋ gega, tareŋmiŋ kurun turnuŋ yaŋ goreb saŋiŋ dirkeb kanduk goke mukku ma ten goya goya saŋiŋ po heŋ hinayiŋ. Irde Al Kurun beleŋ kanduk goyen pasi irwoŋ yeŋ doyaŋ heŋ heŋ ge piŋeŋ ma heŋ hinayiŋ. Irdeb mata deŋ hitte forok yeŋ hinayiŋ kurun goke amaŋeŋ wor po nurde heŋya ¹²Nanniniŋ igiŋ nurd uneŋ hinayiŋ yeŋ gusuŋaŋ irde haryen. Adoniniŋbe mata igiŋ hulsire niŋ mar yeŋ beleŋ doyaŋ yirde igiŋ igiŋ yirde hi gwahade goyen po, deŋ manaŋ igiŋ igiŋ dirtek mar diriŋ. ¹³Irdeb mata buluŋyen kidoma bana mat dumulgaŋ ten Urmiŋ bubulkuŋne wor po yeŋ nurde untiŋ al gore doyaŋ yirde hi gasuŋ bana goŋ dawaryiŋ. ¹⁴Urmiŋ gore mata buluŋniniŋ halde dunyiŋ geb, neŋbe kidoma bana ma heŋ igiŋ po hite gago.

Yesu Kristuyen mataya metenya

¹⁵Be, Yesu Kristube al beleŋ keneŋbe Al Kurun banare hi gobe al gwahade yeŋ bebak titek. Yeŋbe det kurun gate miŋ al. ¹⁶Yeŋ beleŋ gab Al Kurun beleŋ inke det kurun gayen yiryiŋ. Det naŋkinde niŋya megen niŋya, det kawan niŋya banare niŋya yiryiŋ. Banare niŋbe Al Kurunyen miyoŋ tareŋmiŋ karkuwaŋ kurayen kurayen hende niŋya bande niŋya, al deŋem yaŋya deŋem moŋya goyen yiryiŋ. Forok yamiŋ kurun gobe yeŋ beleŋ yiŋgeŋ ge ten yiryiŋ. ¹⁷Yeŋbe det kurun gayen forok ma yekeya hinhin. Irdeb det kurun gayen yirdeb gwahade po hinayiŋ yeŋ yiryiŋ gwahade po gasuŋeŋyaŋ haŋ. ¹⁸Yeŋbe alya bereyamiŋ sios gote doyaŋ al wor po geb, siosbe Yesuyen uliŋ pigiŋ yara, irdeb yiŋgeŋbe sios gote tonan. Yeŋbe al kamtiŋde mat huward huward mata goyen miŋ uryiŋ al geb, yeŋbe mata gote miŋ al. Gogab det kurun gate doyaŋ al kurun heweŋ yeŋbe gogo gwaha tiyyiŋ. ¹⁹Al Kurunbe matamiŋ, dufaymiŋyabe tareŋmiŋya goyen tumŋaŋ Urmiŋ uneŋ uneŋ niŋ amaŋeŋ nurdeb unyiŋ. ²⁰Irde Al Kurunbe megen niŋ detya naŋkinde niŋ detya kurun gayen yeŋya awalikde heŋ heŋ goke amaŋeŋ nuryiŋ. Niŋgeb gwaha ire yeŋbe Urmiŋ ten kerke kateŋ kuruse hende darim wok irde kamiŋ.

²¹Hakot deŋbe mata buluŋ ten hinhan geb, dufaytiŋbe gisaw wor po heŋ Al Kurun hitte ma hinhin, irde asogo irde hinhan. ²²Gega Al Kurunbe deŋya awalikde hitek yeŋbe Urmiŋ ten kerke kateŋ al wor po

hej kuruse hende kamyiņ. Gogab haŋka gabe deŋ kuruŋ gayen diliņde wukkeŋ hej uliņde merem moŋ hejbe gwaha mat kura merem yaŋ dirtek moŋ hinayiņ yeŋ gogo gwaha tiyyiņ. ²³ Niņgeb gwahade hitek yeŋbe dufaytiņ Yesu niņ saŋiņ irdeb gwahade po hinayiņ. Dufaytiņ yeŋ ge tareŋ iramiņ goyen tareŋ po tanarde hinayiņ. Irde Yesu niņ yitiņ mere igiņ go nurde kame Al Kuruŋ beleŋ igiņ igiņ diryeŋ go yeŋ nurd nurd gobe go ma tubul tinayiņ. Mere igiņ gobe megen niņ alya bereya kuruŋ gayen momoŋ yirde tukutiņ haŋ. Ne Pol wor mere igiņ tagalde tukuŋ tukuŋ meteŋ al wor po himiriņ. Niņgeb mere igiņ goyen deŋ wor nuramiņ.

Kolosi sios Pol beleŋ faraŋ uryiņ

²⁴ Be, nebe deŋ ge teŋ ulne misiņ kateŋ hime goke amaŋeŋ nurde hime. Yesu Kristuyen alya bereya siosbe Yesu Kristu uliņ pigiņ yara geb, sios beleŋ kanduk yeneŋ hi gobe Yesu Kristu yiņgeŋ kanduk yeneŋ hi yara. Niņgeb kanduk kuruŋ sios hitte forok yeŋ haŋ goyen ne hitte manaŋ tumŋaŋ forok yeŋ hinayiņ goke amaŋeŋ nurde hime. ²⁵ Nebe Al Kuruŋ beleŋ deŋ ge teŋ meremiņ tumŋaŋ tagalde tukuŋ hayiņ ninyiņ. Niņgeb goyen meteŋ teŋ teŋ al himiriņ geb, gago meteŋ teŋ hime. ²⁶ Bikkeŋbe Al Kuruŋyeŋ mere gote miŋbe ulyaŋde wor po banare hinhin. Niņgeb megen niņ al tumŋaŋ bebak ma teŋ hinhan. Gega gayenterbe alya bereyamiņ hitte kawan yikala yirkebe bebak teŋ haŋ. ²⁷ Mel gobe Al Kuruŋ beleŋ meremiņ igiņ wor po turuŋ yaŋ gote miŋ banare hitiņ goyen yikala yirmeke bebak tinayiņ yeŋ nurdeb al miŋ hoyaŋ Yuda mar moŋ bana niņ mar goyen basaŋa yiryiņ. Meremiņ banare hi gote miŋbe gahade: Yesu Kristube denya haŋ geb, deŋ wor Al Kuruŋyeŋ saŋiņ turuŋ yaŋ bana hinayiņ. ²⁸ Goke teŋbe Yesu Kristu niņ al buda kuruŋ gayen momoŋ yirde tukuŋ hityen. Irde daha wor al buda kuruŋ gayen Yesu Kristuya hejbe muŋ kura buluŋ miŋmoŋ hinayiņ yeŋ Al Kuruŋyeŋ dufay wukkeŋde al bebak yirde saba yirde hityen. ²⁹ Nebe meteŋ gayen gake ulne misiņ tap urde kurut wor po yeŋ himyen. Gwaha teŋ heŋyabe ne hitte meteŋ tareŋ po teŋ hi al gote tareŋde meteŋ teŋ himyen.

2 ¹ Be, deŋ Kolosi niņ marya Laodisia niņ marya irde keŋkela ma nurd nuneŋ haŋ marya goyen tumŋaŋ faraŋ durd durd niņ kurut wor po yeŋ hime gayen deŋ tumŋaŋ nurwoŋ yeŋ nurde hime. ² Deŋ ge teŋ kurut yeŋ hime gabe kurut yeŋ hime gore faraŋ durke bitiņde mat saŋiņ hejbe kadtiņ ge amaŋeŋ nurde awalikde hinayiņ yeŋbe gago kurut yeŋ hime. Gogab Al Kuruŋyeŋ dufay nurde bebak teŋ teŋ tareŋbe kuruŋ hiyyeŋ. Irde gab Al Kuruŋyeŋ mere gote miŋ bikkeŋ banare hinhin goyen miŋ nurnayiņ. Al Kuruŋyeŋ mere gote miŋ banare hinhin gobe Yesu Kristu. ³ Yeŋ banabe Al Kuruŋyeŋ dufay wukkeŋya meremiņ bebak teŋ teŋ dufayya goyen bana yirtiņ haŋ. Dufay wukkeŋya meremiņ bebak teŋ teŋ

dufayya gobe samuŋ tareŋ wor po. ⁴Mongo al kura beleŋ waŋ usi dirde Yesu Kristu niŋ dufaytiŋ saŋiŋ irtiŋde mat hoyan dukunak geb, mere gago dirde hime. Gogab go mar gote mere hapek yaŋ goyen fudinde yeŋ ma nurnayiŋ. ⁵Nebe denya tumŋaŋ gor ma hite goyenbe, dufaynerbe denya tumŋaŋ gor hite. Irdeb heŋ heŋtiŋbe keŋkela wor po haŋ goke aman heŋ hime. Irde Yesu Kristu niŋ dufaytiŋ tareŋ irde haŋ goyen manan korgoŋ moŋ, tareŋ irtiŋ haŋ goke manan aman wor po heŋ hime.

Yesuya po heŋ mata teŋ hitek

⁶Ningeb Yesu Kristube Doyaŋ Al Kurunŋiniŋ yeŋ nurd unamiŋ geb, hugiŋeŋ yenya heŋbe mata igiŋ po teŋ hinayiŋ. ⁷Irdeb he filgiŋiŋ kura megeŋ binde kurkuŋ saŋiŋ hanŋen go gwahade, irde ya kura tola tareŋ hende irtiŋ go gwahade goyen po, Yesuya heŋ tareŋ heŋ hinayiŋ. Irdeb saba dirteke yeŋ ge dufaytiŋ saŋiŋ iramiŋ gobe tareŋ po tanarde hinayiŋ. Irdeb hugiŋeŋ Al Kurunŋ igiŋ wor po nurd uneŋ hinayiŋ.

⁸Be, al kura beleŋbe megeŋ niŋ saba momoŋ dirde hikeb fudinde yeŋ nurde gama ma yirde hinayiŋ. Go mar gote sababe miŋ miŋmoŋ wor po. Yeŋbe asem yagot tikulaya megeŋ niŋ sabaya go po gama yirde haŋ. Yesu Kristuyen merebe gama ma irde haŋ. Ningeb saba gobe Yesu Kristuyen moŋ. ⁹Yesu Kristube Al Kurunŋ gega, al wor po heŋ megeŋ gar hinhin. Ningeb yeŋ po gab Al Kurunŋyen dufayya matayabe tareŋmiŋya goyen maŋiŋ wor po hitiŋ hi. ¹⁰Deŋ wor Yesu Kristuya heŋ dufaymiŋya matamiŋyabe saŋiŋmiŋya goyen kurunŋ wor po dunke maŋiŋ hitiŋ haŋ geb, saba hoyan kura gama irtek ma haŋ. Yeŋbe megeŋ niŋ doyaŋ mar banare niŋya kawan niŋya kurunŋ gote doyaŋ al wor po.

¹¹Be, Yuda mar guba yeŋ hanŋen gwahade yara, deŋ manan Yesu Kristuya hikeb yeŋ beleŋ mata hoyan mat guba yeŋ duntiŋ yara diriŋi. Yeŋ beleŋ guba yeŋ duntiŋeŋbe bitiŋde mata buluŋ teŋ teŋ dufay goyen yad siŋa yiriŋi. Gobe al beleŋ haniŋde guba yeŋ hanŋen gwahade moŋ. ¹²Yesu beleŋ guba yeŋ yeŋ mata duntiŋeŋbe fe baptais teŋ teŋ mata dunyiŋ. Deŋ baptais tamŋ gote miŋbe Yesu kamke mete tiyamiŋ gwahade po, deŋ wor fe bana kurkamiŋ gobe kamtiŋeŋ tiyamiŋ. Goyenpoga Al Kurunŋ beleŋ Yesu kamtiŋde mat isaŋ hiriŋ tareŋmiŋ goke dufaytiŋ tareŋ irkeb Al Kurunŋ beleŋ deŋ wor disaŋ hitiŋ yara dirde al gergeŋ diriŋi.

¹³Be, deŋbe Yuda mar moŋ al miŋ hoyan. Ningeb hakotbe Moseyen saba ma nurdeb mata buluŋ kurayen kurayen teŋ heŋbe Al Kurunŋ diliŋde kamtiŋ yara hinhan. Goyenbe Yesu Kristu isaŋ hiriŋ gwahade goyen po, deŋ wor disaŋ hitiŋ yara dirde al gergeŋ diriŋi. Al Kurunŋbe gwaha mat neŋ kurunŋ gate mata buluŋ halde dunyiŋ. ¹⁴Neŋbe mata buluŋ teŋ hitekeb Moseyen saba gore merem yaŋ dirtek hinhet. Goyenpoga Al Kurunŋbe Yesu Kristu beleŋ kuruse hende kamiŋ gwahade po, merem yaŋ

dirtin goyen wor kuruse hende kerde mayde pasi iryin. ¹⁵Gwaha matbe Al Kurun belen megen nin doyan mar banare ninya kawan ninya kurayen kurayen gote sanin goyen yad sinja yiryin. Taremin yad sinja yiryin goyen al belen kenej bebak tinan yenbe gogo Yesu kuruse hende kamyin.

Megen nin marte mata ma gama irnayin

¹⁶Ningeb al kura wan dula ten ten mataya Al Kurun nin dufay hen hen ge gabu ird ird nalu karkuwanja gagasi gergen forok yeke goke gabu ird dula ten ten matayabe Sabat naluya goyen goke gwaha gwaha ten hinayin dinen tikeb kenej unan ten hinayin. ¹⁷Mata bikkek kurun gabe kame mata gergen forok yetek gote tunanen po hinhan. Irde Yesu Kristu wayyin de matbe mata gergen fudinde goyen forok yamin yenen hite gago. ¹⁸Be, al kurabe ne harhem harhem dufay minyan gega, dufay goyen bana kerdeb al denem minmonde mata yara ten hanjen. Irde al kurabe Al Kurunyen miyon dolon yird yird nin aman hen hanjen. Go mar gobe huginen mitereya yuwarwarteya det yenen henbe goke ug po tagalde hanjen. Irde megen nin dufay po gama ird han geb, yingen ge turun turun ten hanjen. Ningeb denbe kame matatin gote murungem igin yawartek gega goyen gore usi dirke son henak geb, tare hen hinayin. ¹⁹Go mar gobe Yesu Kristuya gabu hetek mon, hoyan hoyan wor po. Gega nenbe Yesu Kristu ulin pigin yara, munan yingenbe tonan yara geb, nenbe yen hitte mat basan henbe kurabe hani, kurabe kahan gwahade ala henbe kadam faran gurd ten hite. Irde Al Kurun belen gwaha mat mat tare henayin yen nurde hi gwahade mat po sanin hen hite.

²⁰Be, denbe Yesu Kristuya tumnan kamamin geb, megen nin saba gote yufukde ma han. Gega dahade geb saba bikkek goyen gama po ird han? Saba bikkekdebe, ²¹“Det gobe tanarde ma, ird det go goya nene ma, munan det gobe san urde ma,” yitin goyen dani geb gama ird han? ²²Saba bikkek gobe megen nin al belen po forok yirtin, ird megen nin det mugol netek goke yen yitin. ²³Saba bikkek gama ird han mar gobe Al Kurun dolon ird ird mata goyen tare irtak yenbe yingen de dufaymin po gama ird tare ird hanjen. Irde ne harhem harhem dufay minyan gega, dufay goyen bana kerdeb al denem minmonde mata yara ten hanjen. Irde mata bulun ulninin de han gayen hubu hewon yen nurdeb ulin yusulak ten, bing kutna ird, ulin de mata kurayen kurayen ten hanjen. Mata gwahade ten han mar go yenenminbe dufay wukken gama ird han yara. Goyenpoga go mar gobe mata bulun ten ten nin bin harkeb dufay bulun go epte ma hika titek han.

Al Kurun dilingde wukken hen hen mata

3 ¹Goyenpoga denbe Yesu Kristuya kamtin de mat huwaramin geb, bitin de mat wor po det Al Kurunyen gasun de han goke po nurde

hinayin. Al Kurunyen gasunde gorbe Yesu Kristu beleŋ Doyaŋ Al Kurun heŋbe Al Kurunyen haniŋ yase beleŋ keperde hi. ² Ningebe det Al Kurunyen gasunde niŋ goke po dufay heŋ hinayin. Det megen niŋ ge ma dufay heŋ hinayin. ³ Deŋbe Yesu Kristu niŋ dufaytin saŋin iramiŋ goya goyenbe yenya kuruse hende kamamiŋ yara hamiŋ. Irdeb kamtinde mat Al Kurun beleŋ disaŋ heke huwarde al gergeŋ hamiŋ. Ningebe Yesu Kristu Al Kurun hitte hi gwahade goyen po, deŋ al gergeŋ hitin mar wor Al Kurun hitte haŋ. ⁴ Ningebe Al Kurunya hugineŋ heŋ heŋ mata gote miŋ al Yesu Kristu tareŋmiŋ turunŋ yaŋ goya megen gar forok yiyyenya goyenbe deŋ wor tareŋtin turunŋ yaŋ manan forok yenayin.

⁵ Ningebe megen niŋ mata bulun ultinde haŋ kurun gobe yisikamnan ko. Mata bulun gobe gahade: leplep mata, mata bulun mormok dapŋa kukuwa beleŋ titin yara teŋ teŋ mata, ulinde aman hetek mata teŋ teŋ dufay, mata bulun teŋ teŋ dufayyabe det uguŋ po yad yad niŋ dufay heŋ heŋ mataya. Det uguŋ po yad yad niŋ dufay heŋ heŋ mata gobe unŋura doloŋ yird yird mataya tunande. ⁶ Al Kurunyen beararbe mata gwahade teŋ haŋ mar goke katyeŋ. ⁷ Deŋ wor hakotbe mata bulun gwahade goyen teŋ kuŋ hinhan. ⁸ Gega gayenterbe mata bulun gahade gayen yubul po tinayin. Mata gobe gahade: bearar mata, kuŋurun mata, al bulun yird yird dufay, mere bulun mat teŋ teŋ matayabe nanyaŋ teŋ teŋ mataya. Ningebe deŋbe mata goyen tumnan po yubul tinayin. ⁹⁻¹⁰ Deŋbe mata bikkek bitin bana hanŋyen goyen yad siŋa yirdeb al gergeŋ haŋ geb, kadam usi gird ma teŋ hinayin. Al gergeŋ hitin gobe Al Kurun beleŋ yineŋ yara dirde gergeŋ diryin geb, gogo hugineŋ gergeŋ dirde hikeb Al Kurunbe al gwahade yeŋ kenkela nurdeb yenya kadam nurd gunen teŋ awalikde wor po hinayin. ¹¹ Al Kurunya awalikde hiniŋ yeŋ nurde haŋ marbe igin gwaha teŋ hinayin. Yesu Kristube Kurunniŋ wor po. Yenbe neŋ kurun gaya awalikde hite. Ningebe Grik mar ma Yuda mar, guba yitin mar ma guba ma yitin mar, saba karkuwan yawartin mar ma gwahade ma yawartin maryabe meten mar ma doyaŋ marya kurun goyen banabe bipti miŋmon. Igin ala po Al Kurunya awalikde hinayin.

¹² Ningebe deŋbe Al Kurun beleŋ bubulkunne wor po yeŋ nurde dunen basaŋa dirde wukken wor po dirtin haŋ geb, matabe gahade teŋ hinayin: kadtin ge bunineŋ nurd yunen hinayin, irde igin igin yirde hinayin, dindiken ge turun turun ma teŋ hinayin, bekenge igin mat al mere yirde hinayin, irde kadtin kura matamiŋ igin hewon yeŋ doyaŋ heŋ heŋ ge pineŋ ma heŋ hinayin. Mata gahade gab ultin umŋa yade hor yirde kuŋ hanŋyen yara hugineŋ gwaha po teŋ hinayin. ¹³ Al kadtin kura beleŋ bulun dirke goya goke bulunen ma nurnayin. Doyaŋ Al Kurun beleŋ mata buluntin halde dunyin gwahade goyen po, ditiŋde mata bulun goyen wor halde yunen hinayin. ¹⁴ Irdeb mata igin igin buda kurun go hendebe kadtin ge amanen nurd yunen yunen matatin yaŋ hinayin. Gwaha teŋ

hinayinbe denj tumnan goyen al minj unjkurenj wor po henj awalikde po hinayinj.

¹⁵Be, Yesu Kristube al binj yisikamde kamde al. Ningeb tubul tike yenj belen bitinj yisikamkeb awalikde hinayinj. Denbe al minj hoyanj hoyanj gega, awalikde henj Yesu yufukde al minj unjkurenj henj henj goke tenj basinja diryinj. Irdeb goke tenj Al Kurunj iginj nurde unenj hinayinj. ¹⁶Irde Yesu Kristuyen merebe bitinj bana gasunj unke kenkela wor po kipiryenj. Irdeb kenkela dufay henj Al Kurunjen mere kadam saba gird tenjbe, “Gwaha mat hitek gab iginj,” yenj kadam momonj gird tenj hinayinj. Irdeb bitinde mat Al Kurunj iginj nurd unenja Al Kurunjen asande ninj tikiinja Al Kurunj turunj ird ird tikiinyabe Holi Spirit belen bitinde tikiinj yupul titinj goyen tikiinj henj hinayinj. ¹⁷Irdeb mere tenj hinayinj ma mata kura tenj hinayinj kurunj gobe Doyanj Al Kurunj Yesu nurd untinj mar belen titek mat po tenj hinayinj. Irdeb Yesu Kristu hitte mat sanjinj tenjbe Al Kurunj iginj nurd unenj hinayinj.

¹⁸Be, denj bere almetinj yanjbe almetinj yagot yufukde po hinayinj.^a Go tenj hinayinj gobe Doyanj Al Kurunj gama irde hanj mar belen mata titek goyen po tenj hinayinj.

¹⁹Denj al berem yanjbe bertinj yago ninj amanejn nurd yunenjbe mata yenj binj misinj nurtek mat ma yirde hinayinj.

²⁰Denj dirinjbe mamtinja nantinyat mere nurdeb gama irde hinayinj. Doyanj Al Kurunjbe mata gwahade gokeb amanj henj hiyen.

²¹Denj dirinj naninj yagobe dirintinj yago binj ar yenanj mat ma mata yirde hinayinj. Monjo gwaha yirkeb kame kafura dufay kurunj henjbe keperd keperdmij iginj ma henayinj geb.

²²Denj al kurat yufukde henj meten tenj hanj marbe megen ninj doyanj martinjbe mere nurde hinayinj. Meten tenj hinayinj goyen doyanj martinj yago belen denenj hikeya po gwaha titekeb turunj dirnanj yenj nurdeya ma meten tenj hinayinj. Gwaha titnenjbe Doyanj Al Kurunj palap irde yenj ge meten tenj hite yenj nurdeya bitinde mat wor po doyanj martinj ge meten tenj hinayinj. ²³Meten tenj hinayinj kurunj gobe bitinde mat wor po Doyanj Al Kurunj ninj meten tenj hite yenj nurdeya meten tenj hinayinj. Al ninj meten tenj hite yenj ma nurde hinayinj. ²⁴Mata gwahade tenj hinayinjbe Doyanj Al Kurunj belen mata iginj tenj hinayinj gote murungem dunenj yirinj goyen dunyen. Ningeb meten tenj hinayinj kurunj gobe Doyanj Al Kurunjinj Yesu Kristu ninj meten tenj unenj hite yenj nurde gab meten tenj hinayinj. ²⁵Munanj al kura mata iginj ma tenj hiyenjbe gote wolminenjbe murungem bulunj tiyyenj. Al Kurunjbe al kura po iginj inenj, kurabe bulunj inenj ma yirde hiyen geb, bulunj titekeb bulunj diryenj.

^a 3:18 Mere gabe albe hende berebe bande yenj ma yitinj. Albe Al Kurunjen mere saba yirke berembe nurde gama iryen yenj goke yitinj.

4 ¹Be, denj doyanj mar wor gwahade po metenj martinj goyen mata huwak mat po kenjela doyanj yirde hinayinj. Denj wor Doyanj Al Kurunjinbe Al Kurunjen gasunje hi gogo yenj nurde hanj geb, gago dinenj hime.

Al Kurunya mere tenj tenj matatinbe tarej po irnayinj

²Be, nalutinj kurunbe Al Kurunj mere ird ird ninj nurde hinayinj. Irdeb Al Kurunj mere irde henjyabe dufaytinj mali hiburnenj ma hiyen. Irdeb bitinje mat amanenj nurde unenj turunj irde hinayinj. ³Be, Al Kurunj mere irde henjyabe nenj belej Yesu Kristu ninj yitinj mere banare hi goyen tagaltek beljenj kerd dunkeb al budam mere goyen nurnayinj yenj gusunanj irde hinayinj. Nebe mere go tagalde himeke goke nad koyare neranj gago hime. ⁴Ningeb ne ninj Al Kurunj gusunanj irde hinayinj. Irkeb mere tagalenj yenj nurde hime gobe kama ma henj kenjela po tagalenj.

⁵Be, Yesu Kristu ninj ma nurde hanj mar hittebe dufay kenjela henj ga mata tenj hinayinj. Irdeb Yesu ninj momonj yirtek belej kura kenenj goya kama ma henj momonj yirde hinayinj. ⁶Irdeb meretinbe huginenj al belej nurdeb, “Fudinde, ne faranj nure yenbe gago mere nirde hi,” yenj nurtek mat mere tenj hinayinj. Irdeb al belej gusunanj kura dirkeb gwaha mat wol hetekbe iginj nurnayinj mat po wol henj hinayinj.

Mere funanj

⁷Be, Tikikus belej gab ne dahade hime goyen momonj diryenj. Yenbe kolne wor po yara, irde binje mat fudinde wor po Doyanj Al Kurunj ninj metenj tenj hiyen. Yenbe metenj kadne iginj wor po. ⁸Yenj belej gabe nenj dahade hite goyen momonj dirke go nurdeb amanj henj tarej henayinj yenj gago hulyanj irhem. ⁹Yenbe Onesimusya kuriryenj. Onesimus wor binje mat fudinde wor po Doyanj Al Kurunj ninj metenj tenj hiyen. Yenbe kolnininj wor po yara. Yenbe al hoyande ninj monj, dende al po. Irem garebe nenj hitere gar mata forok yenj hanj kurunj gayen tumnanj momonj diriryenj.

¹⁰Be, kadne kura neya koyare har al Aristakus belej denj ge dufay henj hi gayen momonj yirayinj ninkeb gago dinenj hime. Banabas nominj Mak wor gwahade po denj ge dufay henj hi. Yenj ge momonj dirmirinj gogo geb, yenj kunj forok yeke kenenbe gargar irde kenjela doyanj irde hinayinj. ¹¹Be, Yesus denjem kurabe Yastus mananj denj ge dufay henj hi. Metenj faranj nurde hanj mar bana gonbe al karwo ga po ga Yuda mar. Mel gobe neya henj Al Kurunj belej alya bereyaminj doyanj yird yird gote metenj tenj kunj hityen. Irde kurare kanduknenj nurde himekeb bene yurum irde hanjen. ¹²Be, dende al kura Yesu Kristuyen metenj al Epafra goyen wor denj ge dufay henj hi goyen momonj yirayinj ninke gago momonj dirde hime. Al gobe dende al. Yenbe denj goyen Al Kurunjen dufay tumnanj yenenj bebak tenj sanj po huwardeb Yesuyen mere gama

ird ird niŋbe al parguwak yara heŋ yeŋ ge hekkeŋ wor po nurde hiwoŋ yeŋ hugiŋeŋ tareŋ po Al Kuruŋ gusuŋaŋ irde hiyen. ¹³Yeŋbe deŋ ge po moŋ, Laodisia taundeŋa Hierapolis taundeŋa niŋ Yesuyen alŋa bereŋa goke wor tareŋ wor po Al Kuruŋ gusuŋaŋ irde hiyen gobe fudinde yeŋ dineŋ hime. ¹⁴Kadniniŋ wor po yeŋ ge amaŋeŋ wor po nurde hityen al guram al Lukyabe Demasya manaŋ deŋ ge dufay heŋ har goke momoŋ yirayiŋ ninkeb gago dineŋ hime. ¹⁵Laodisia taunde niŋ Yesuyen alŋa bereŋa goŋa bere kura Nimfayabe yamiŋde gabu irde Al Kuruŋ doloŋ irde haŋyen marya goyen manaŋ ne niŋ yeŋ, “Yeŋ beleŋ deŋ ge dufay heŋ hi,” yinnayiŋ. ¹⁶Be, asaŋ gayen deŋ wa kapyan heŋbe Laodisia taunde niŋ Yesuyen alŋa bereŋa sios wor kapyan henayiŋ yeŋ teŋ kerke gor kuyeŋ. Irdeb asaŋ kura yeŋ ge kamiŋ goyen wor kamebe deŋ beleŋ wor teŋ kapyan henayiŋ. ¹⁷Irdeb Akipus goyen, “Doŋaŋ Al Kuruŋ beleŋ meteŋ guntiŋ gobe keŋkela tanarde meteŋ teŋ hayiŋ,” innayiŋ.

¹⁸Ne Pol beleŋ hanner wor po gahade kaŋ hime: “Deŋ ge dufay heŋ hime.”

Be, ne koyare hime gake bitiŋ sir ma yiyyeŋ. Deŋbe Al Kuruŋ beleŋ buniŋeŋ dirde igiŋ igiŋ dirwoŋ yeŋ nurde hime. Gogo po.